

POPERA GA COROCHAWA YEXMAGÜXÜ GA YAXÖGÜXÜTANÜWA NAMUXÜ GA PAURU

Pauru rü nüxü narümoxe ga yema
yaxögüxü ga Corochawa yexmagüxü

1 ¹⁻²Pa Chaueneëgü ya Corochaarü
İānewa Ngëxmagüxex, choma i
Pauru rü wüxigu namaã i taeneë i
Timutéu nixi i pexçax tanaxümatüxü i
ñaã popera. Rü choma chixi i Tupana
choxü yaxuxü na Ngechuchu ya Cristu
choxü muxüçax na nüxü chixuxüçax i
norü ore. Rü pexçax chanaxümatü i
guxāma i pema ya chaueneëgü ya
aixcūma Tupanaärü duüxügü ixigüxe rü
Cristuaxü yaxögüxe. Rü chanaxwaxe i
Tanatü ya Tupana pexü narüngüxëe na
meã pegümaã pemaxëxüçax rü
petaãëgüxüçax.

Pauru rü yema yaxögüxüçax nayümüxë

³Rü guxüguma i ngëxguma pexçax
tayümüxëgügu, rü moxë nüxna taxā ya
Tupana ya Nanatü ya törü Cori ya
Ngechuchu ya Cristu. ⁴Rü ngëmaäcü
tanaxü erü marü nüxü tacuáchiga na
ñuxäcü aixcūma meã Ngechuchu ya
Cristuaxü peyaxögüxü, rü aixcūma nüxü
pengechaügüxü i guxūma i ngëma

duüxügü i Tupanaärü ixigüxü. ⁵Rü nüxü
tacuaxgü na ngëmaäcü meã
Tupanapexewa pemaxëxü erü
penayauxgüchaü i ngëma mexügü i
Tupana pexü namaã nguxüxü i daxügüxü i
naānewa. Rü ñuxma rü meã ípenangüxëe
na penayauxgüxüçax i ngëma mexügü
yerü marü nüxü pexinüë ga Tupanaärü ore
i mexü i aixcūma ixixü. ⁶Rü ngëmatama
ore i mexü ga pexütawa nguxü, rü
guxüwama nangu i ñuxmax. Rü
guxüwama ningüchigü rü duüxügüarü
maxüxü naxüchicüü, yema perü maxüxü
na naxüchicüüxürüü ga yexguma nüxü
pexinüëgu rü nüxü pecuaxgügu na ñuxäcü
Tupana aixcūma pexü na ngechaüxü rü
pexü rüngüxëëchaüxü. ⁷Rü ngëma ore i
mexü nixi ga pexü nangüxëëxü ga
Epáparu ya taeneë ya nüxü ingechaügücü
ya wüxigu tomaã Tupanaärü orewa
puracücü. Rü nüma rü Cristuarü
puracütanüxü ya mecü nixi, rü nüma nixi i
tochicüü pexü nangüxëëxü. ⁸Rü nüma ya
Epáparu nixi i tomaã nüxü yaxuxü i
pechiga na ñuxäcü Tupanaäe i Üünexüärü
ngüxëëmaã choxü pengechaügüxü. ⁹Rü
ngëmacax i toma ga noxritama pexü

tacuáchigagu, rü taguma nüxũ itayarüngümaẽ na pexçax tayumüxëgüxũ. Rü guxũguma Tupanana naxçax tacagü na meã pexũ nüxũ nacuaçxëxũçax i ngëma nüma nanaxwaxexũ na penaxiuxũ. Rü nüxna naxçax tacagü na pexna naxããxũçax i nagúxúraũxũ i cuax i Naãẽ i Üünexũwa ne xũ. ¹⁰Rü nüxna naxçax tacagü na meã tórü Cori naxwaxexũãcuma na pemaxëxũçax rü guxũguma penaxiuxũçax i ngëma nüma nanaxwaxexũ. Rü nüxna naxçax tacagü na pexũ natauxchaxëãxũçax na togüxũ perüngüxëgüxũçax rü guxũ i ngunexũgu yexeraãcü Tupanaxũ na pecuaçgüxũçax. ¹¹Rü nüxna naxçax tacagü na norü pora i mexëchixümaã pexũ naporaexëxũçax, na namaã peporaexũçax i guxũma i guxchaxũgü rü yaxna namaã pexĩnüëxũçax. ¹²Rü ñuxũchi tanaxwaxe i taãëacuma Tanatü ya Tupanana moxë pexã, erü nüma pexũ nimexëëgü na pema rü ta penayauxgüxũçax i ngëma mexũgü i naxũtawa ngëmagüxũ i nüma tá nüxna naxãxũ i ngëma duũxũgü i noxrü ixĩgüxũ. ¹³Yerü nüma ga Tupana rü marü Chatanámexëwa tüxũ ínanguxũxëẽ rü Nane ya nüxũ nangechaũcümexëwa tüxũ nangëxmagüxëẽ. ¹⁴Rü guma Nanegagu nixĩ ga tüxũ namaxëxëxũ rü tüxũ nüxũ nangechaũxũ ga tórü pecadugü.

**Rü yexguma pecaduçax nayuxgu
ga Cristu rü Tupana nügümaã
nanangüxmüëxëẽ ga duũxũgü**

¹⁵Taguma texé Tupanaxũ tadau, natürü nüma rü núma nanamu ga Nane na duũxũgü nüxũ daugüxũçax rü nüxũ nacuaçgüxũçax na ñuxãcü na yĩxũ i nüma ya Tupana. Rü naxũpa i guxũma i

taçü i ñuxma ngëxmaxũ, rü nüxĩra nayexma ga Tupana Nane. ¹⁶Rü Nanexũ nixĩ ga namuxũ ga Tupana na naxũãxũçax ga guxũma i taçü i ñuxma ngëxmaxũ i daxügüxũ i naãnewa rü ñoma i naãnewa, rü guxũma i ngëma nüxũ idauxũ rü ngëma tama nüxũ idauxũ. Rü yemaãcü nanaxü ga guxũma ga norü orearü ngeruũgü i daxüçũãxãrũ ãëxgacügü rü guxũma ga ngoxogüarü ãëxgacügü. Rü yemaãcü nanaxü ga guxũma na nüxũ yacuaxũũgüxũçax. ¹⁷Rü naxũpa i guxũma i taçü i ñuxma ngëxmaxũ, rü Cristu rü marü nüxĩra nayexma. Rü nagagu nixĩ i meã inanuxũ i guxũma erü nüma nixĩ i namaã inacuaçxũ. ¹⁸Rü nüma ya Cristu rü naëru nixĩ i guxũma i ngëma yaxögüxũ. Rü nüma nixĩ ga naxũãxũ rü nüxna naxããxũ ga maxũ. Rü nüma nixĩ ga nüxĩra yuwa ínadaxũ na guxũãrũ ãëxgacü yĩxũçax. ¹⁹Rü Cristu rü Tupanaxũchi nixĩ, yerü yemaãcü nanaxwaxe ga Tupana. ²⁰Rü Tupana rü ñoma ga naãnewa nanamu ga Cristu na curuchagu pecaduçax nayuxũçax. Rü yemaãcü nixĩ ga Tupana nügümaã nangüxmüëxëxũ ga guxũma i ñoma i naãnewa ngëxmaxũ rü guxũma i daxügüxũ i naãnewa ngëxmaxũ. Rü yemaãcü nanaxü ga Tupana yerü yemaãcü nanaxwaxe. ²¹Rü pema ga ũpa rü tama Tupanamüçügü pixĩgü yerü aixcüma norü uwanügü pegü pixĩgüxëẽ yerü chixexũgu perüxĩnüë rü chixexũ pexüe. ²²Natürü i ñuxma ya Tupana rü nügümaã pexũ narüngüxmüëxëẽ na namüçügü i mexũ pixĩgüxũçax. Rü yemaãcü nanaxü ga Tupana ga yexguma Cristu duũxũxũ ixĩxgu rü

curuchawa ngúxũ yangexgu rü yexma nayuxgu. Rü yemaäcü nayu ga Cristu na nügüxũtawata pexũ nagagüxũcax rü napexewa pimexũcax rü nataxuxũcax i perü chixexũ. ²³Natürü ngéma na pengugüxũcax, rü penaxwaxe na meã peyaxögüechaxũ rü meã naga pexĩnüëxũ rü taguma nüxũ perüxoexũ i ngéma norü ore i mexũ ga marü nüxũ pexĩnüëxũ. Rü yema ore ga marü nüxũ pexĩnüëxũ, rü ngématama ore nixĩ i nüxũ chixuxũ i chomax. Rü ñuxma rü guxũ i nañewa nixĩ i nüxũ yaxugüexũ.

Tupana rü Pauruxũ namu na guxũma ga yaxögüxũxũ nangüxëëxũcax

²⁴Rü ñuxma rü woo pexcax ngúxũ chingexgu rü chataãë erü nüxũ chacuax rü ñaã chaxunemaã choma rü ta chayanguxëë ga yema ngúxũ ga Cristu ingexũ naxcax i norü duüxũgü i yaxögüxũ. ²⁵Rü ñuxma ya Tupana rü choxũ namu na nüxũ charüngüxëëxũcax i guxũma i ngéma norü duüxũgü i yaxögüxũ. Rü perü mexũcax nixĩ i choxũ namuxũ na guxũwama meã nüxũ chixuxũcax i norü ore. ²⁶⁻²⁷Rü ngéma Tupanaärü ore rü ñanagürü:

“Rü Cristu rü pewa nangëxma i ñuxmax, rü nagaguxicatama nixĩ i pexũ nangëxmaxũ i pechica i daxüguxũ i nañewa i ngextá ínamexëchixũwa”, ñanagürü. Rü yema nuxcũmaügüxũ ga duüxũgü rü tama nüxũ nacuaxgü ga yemachiga, natürü ñuxma ya Tupana rü norü duüxũgüxũ nüxũ nacuaxëë. Erü nüma ya Tupana rü norü duüxũgüxũ nüxũ nadauxëëchaũ na ñuxäcü poraäcü pexũ nangechaũxũ rü pexũ nangüxëëxũ

i guxãma i pema i tama Yudüfugü ixĩgüxe. Rü ñuxma i pema na woo tama Yudüfugü pixĩgüxũ, natürü pema rü ta pexũ nangëxma i pechica i daxüguxũ i nañewa erü Cristuaxũ peyaxögü. ²⁸Rü ñuxma i toma rü Cristuxũ nixĩ i tixuxũ. Rü guxũ i torü cuaxmaã guxũma i duüxũgüxũ tixucuxëgü rü meã tanangüexëë na ngémaäcü Cristugagu ngearü chixexũáxũ Tupanaxũ tawéxũcax. ²⁹Rü ngématama puracü nixĩ i nawa poraäcüxüchima chapuracüamaxũ woo tacü rü guxchaxũ chauxcax ínguxgu. Rü guxũma i ngéma pora i Cristu choxna äxũ i chowa ngëxmaxũ nixĩ i choxũ poraxëëxũ na chanaxüamaxũcax i ngéma puracü.

2 ¹Pa Chaueneëgüx, chanaxwaxe i nüxũ pecuax na ñuxäcü poraäcü pexcax chapuracüxũ. Rü ngëxgumarüü ta chanaxwaxe i nüxũ pecuax na ñuxäcü poraäcü chapuracüxũ naxcax i ngéma taeneëgü i Daodichëaarü íañewa ngëxmagüxũ rü guxũma i petanüxũgü i taguma choxũ daugüxũ. ²Rü ngémaäcü poraäcüxüchima chapuracü na nüxũ rü ta chanangüchaũxëëxũcax. Erü chanaxwaxe i guxũma aixcũma nügü nangechaũgü rü nüxũ nangëxma i ngéma mexũ i cuax i aixcũma ixĩxũ. Rü ngémaäcü tá meãma nüxũ nacuaxgü ga yema noxri Tupanaxicatama nüxũ cuáxũ. Rü yima rü Cristutama nixĩ. ³Rü nüma nixĩ i nüxũ nangëxmaxũ i guxũma i cuax i aixcũma mexũ. Rü nüma nixĩ i taxcax nangoxëëäxũ i Tupanachiga. ⁴Rü pemaã nüxũ chixu i ngéma ore erü tama chanaxwaxe na texé pexũ womüxëëgüxũ namaã i tacü rü ore i chixexũwa pexũ gagüxũ. ⁵Rü woo na

tama ngēma petanüwa changēxmaxũ, natürü chauãēwa rü poraãcü pegu charüxinü. Rü wüxi i chorü taãē nixĩ na nüxũ chacuáxũ na ñuxãcü meã pegü ipinuxũ na meã pegümaã ipecuáxũcax rü ñuxãcü tama nüxũ perüxoexũ na Cristuaxũ peyaxögüxũ.

**Ñuxma na Cristuarü ixĩgüxũ rü
ngexwacaxũxũ i maxũ tüxũ nangēxma**

⁶Rü pema ga noxri rü meãma tórü Cori ya Ngechuchu ya Cristuxũ peyaxügü. Rü ñuxma rü yema noxri meãma na penayauxgüxürüü rü name nixĩ i guxüguma nüxna penaxã i perü maxũ na nüma pexũ namaã inacuáxũcax. ⁷Rü wüxi i nanetü nanaxwaxe i naxchúmaxã na nataixũcax rü na namaxũxũcax. Rü ngēxgumarüü ta i pema rü penaxwaxe na meã Cristuna peyaxũxgüxũ na meã nawa piyaetanüxũcax rü meã naxcax pemaxēxũcax rü meã nüxũ peyaxögüamaxũcax yema noxri Epáparu pexũ ngüxēēgurüü. Rü name nixĩ i guxüguma Tupanana moxē pexã. ⁸⁻⁹Rü naxcax pexuãēgü i ngēma duũxügü i pexũ womüxēēgüchaũxũ! Rü tama name i nüxũ iperüxinüē i ngēma norü ore i tama aixcuma ixĩxũ rü taxuwama mexũ. Erü ngēma duũxügü rü pexũ nangüxēēchaũ na nagu pexĩxũcax i ngēma nacümagü ga nuxcumaũgüxũ ga duũxügü nagu ixũ. Rü ñoma i naãneärü ngüxēētae nixĩ i inaxĩnüēxũ. Natürü tama aixcuma Cristuchiga nixĩ i ngēma pexũ nangüxēēxũ. Rü name nixĩ i nüxna pixigachi i guxũma i ngēma ngüxēētaeruügü i chixexügü rü Cristuwe perüxĩ. Erü Cristu rü Tupanaxũchi nixĩ

rü guxũma i Tupanaärü pora rü Cristuwa nangēxma. ¹⁰Rü ñuxmax, rü Tupanaärü maxũ rü norü pora rü aixcuma pewa nangēxma erü namexwa pengēxmagü ya Cristu ya namaã icuácü i guxũma i daxüçüãxärü ãēxgacügü rü guxũma i ngoxogüarü ãēxgacügü. ¹¹Rü ngēma Yudfugü rü nügü ínawiechaxmüpexechiraügü na Tupanapexewa yamexũcax. Natürü ngēxguma Cristuaxũ yaxögügu rü tama ngēmaãcü tamaã nanaxü ya Cristu na imexũcax. Erü nüma ya Cristu rü tórü maxũwa napuracü rü tüxũ ínanguxũxēē nawa i taxüneärü ngüchaügü. Rü ngēmaãcü nixĩ i tüxũ yamexēēxũ na Tupanapexewa imexũcax. ¹²Rü yexguma ípebaiügu, rü Cristu na itáxürüü yexma natax ga yema nuxcumaũxũ ga perü maxũ. Rü yema Cristu na írüdaxürüü rü pema rü ta penayaxu i maxũ i ngexwacaxũxũ, yerü peyaxögü na Tupana norü poramaã Cristuxũ írüdaxēēxũ. ¹³Rü üpa ga pema rü tama aixcuma pexũ nayexma ga maxũ i taguma gúxü yerü pepecaduãxgü rü pexeneärü ngüchaũ pexügü. Natürü i ñuxma rü Cristuxũ namaxēēxürüü pexũ namaxēēē ya Tupana erü Cristuarü duũxügü pixigü. Rü Tupana rü marü Cristugagu tüxũ nüxũ nangechaũ i guxũma i tórü pecadugü. ¹⁴Rü noxri rü tachixe yerü tama aixcuma naga taxĩnüē ga yema mugü ga Moiché tüxna äxũ, rü tórü pecadugü rü yuwa tüxũ nagagü. Natürü ga Cristu rü curuchagu tórü pecaducax nayu, rü yemaãcü Tupana tüxũ nayangutanüxēē ga yema tórü pecadugü. ¹⁵Rü yexguma curuchagu nayuxgu ga Cristu, rü yexguma nixĩ ga

Chatanáxũ naporamaẽxũ ga Tupana. Rũ yexguma nixĩ ga guxũ ga duũxũgũpexewa Chatanáxũ naxânexẽxũ ñoma wũxi i churaragiuarũ ãẽxgacũ i norũ uwanũ i nũxũ naporamaẽxũxũ naxânexẽxũrũ.

**Name nixĩ i naxcax tadaugũ i ngẽma
mexũgũ i daxũguxũ i naãnewa
ngẽxmagũxũ**

¹⁶Rũ ñuxma rũ taxucaxma tũxcũũ pexũ nixu i ngẽma Yudũgũ ega woo tama naxrũũ penaxũxgux. Nũmagũ rũ ñuxre i õnagũxicatama nangõxgũ, rũ ñuxre i axeũxicatama nixaxgũ, rũ ñuxre i petaarũ ngunexũgũ naxauregũ na ngẽmaãcũ Tupanaxũ yacuaxũũgũxũcax. Rũ nangẽxma i norũ peta i gucũ ya taunecũgu Tupanacax naxauregũxũ rũ togũ i petagũ i gucũ ya tauemacũgu naxauregũxũ. Rũ nũxũ nangẽxma i nacũmagũ na ñuxãcũ ngũxchigaarũ ngunexũgũ naxauregũxũ. ¹⁷Rũ aixcũma yema nuxcũmaũgũxũ ga Yudũgũ rũ nanaxauregũ ga yema nacũmagũ yerũ ga Cristu rũ tauta ñnangu ga yexguma. Natũrũ i ñuxma rũ marũ ñnangu ya Cristu rũ tórũ pecaducax nayu. Rũ ñuxma rũ name nixĩ na naga ixĩnũẽxũ rũ tama nagu ixĩxũ i ngẽma nuxcũmaũgũxũ i nacũmagũ. ¹⁸Rũ tãũtãma naga pexĩnũẽ i ngẽma duũxũgũ i nũxũ ixugũxũ na ipeyarũtauxexũ ega tama daxũcũãx i orearũ ngeruũgũxũ picuaxũũgũgu! Nũmagũ rũ nũgũ ñnarũxĩragũneta rũ nũgũ nixugũ na yangõxetũgũxũ. Rũ noxrũtama cuaxmaãmare nũgũ nicuaxũũgũ. ¹⁹Natũrũ i nũmagũ rũ tama aixcũma naga naxĩnũẽ ya yima taeru ixĩcũ ya

Cristu ya tũxũ poraexẽẽcũ rũ tũxũ iyaetanũxẽẽcũ i tórũ õwa i guxãma i yixema i norũ duũxũgũ ixĩgũxe. Rũ nũma ya Cristu nixĩ i wũxigu tũxũ naxĩnũẽxẽxũ i wũxichigũ i yixema ngẽma Tupana naxwaxexũrũ. ²⁰Rũ yexguma nayuxgu ga Cristu rũ yexma nayu ga nuxcũmaũxũ ga perũ maxũ, rũ yexma nayarũxo ga guxũma ga nuxcũmaũgũxũ ga pecũmagũ i ñoma i naãnecũãx i duũxũgũ nagu rũxĩnũẽxũ. Rũ ngẽmacax i ñuxmax ẽrũ tũxcũũ nixĩ i ñoma i naãnecũãx maxẽxũrũ pemaxẽxũ i pemax, rũ tũxcũũ nixĩ i ngẽma Yudũgũcũmagu pexĩxũ? ²¹Rũ nũmagũ i Yudũgũ rũ nũxũ nixugũe rũ ñanagũrũgũ:

“Tama name i nũxũ quingõgũ i ngẽã, rũ tama name i cunangõx i yea, rũ tama name i cunayaxu i ngẽma”, ñanagũrũgũ. ²²Natũrũ guxũma i ngẽma nacũmagũ rũ paxa tá inayarũxo erũ duũxũgũarũ nixĩgũ. Rũ ngẽma pexũ namuxũ rũ duũxũgũarũ mugũmare nixĩ. Rũ ngẽma pexũ nangũexẽẽxũ rũ duũxũgũarũ nguxẽẽtaemare nixĩ. ²³Rũ guxũma i ngẽma pexũ namuxũ rũ pexcax namexcũraxũ erũ pexũ naxucũxẽgũ na ẽacũ pexauregũxũcax, rũ tama pegũ picuaxũũgũxũcax, rũ meã pexenemaã ipescuaxgũxũcax. Natũrũ guxũma i ngẽma mugũ rũ tama aixcũma pexũ narũngũxẽẽ na nũxũ perũxoexũcax i pexeneãrũ ngũchaũgũ.

3 ¹Rũ ñuxma i pemax, rũ Cristu wena maxũxũrũ rũ pexũ nangẽxma i maxũ i ngexwacaxũxũ. Rũ ngẽmacax name nixĩ i naxcax pedau i ngẽma mexũgũ i daxũguxũ i naãnewa ngẽxmaxũ i ngextã Cristu rũ Tupanaãrũ

tügüñecüwawa írútoxüwa rü namaã ãëxgacü íyüxüwa. ²Rü name nixí i guxüguma nagu perüxínüë i ngëma daxüguxü i naãnewa ngëxmaxü, rü tama ngëma ñoma i naãnewa ngëxmaxü. ³Yerü yexguma nayuxgu ga Cristu rü yexma nayu ta ga nuxcúmaüxü ga perü maxü. Rü ñuxma rü pexü nangëxma i perü maxü i ngexwacaxüxü erü Cristutanüxü pixígü rü Tupanamëxëwa pengëxmagü. ⁴Rü nümatama ya Cristu nixí i pexü namaxëëxü. Rü ngëxguma wena núma nangoxgu, rü namaã tá pengóe, rü naxrüü tá pimexëchi.

Marü nüxü tarüxo i nuxcúmaüxü i tacüma i chixexügü rü tanayaxu i ngexwacaxüxü i tóru maxü

⁵Rü ñuxma rü name nixí i nüxü perüxoe i guxüma i ñoma i naãneärü chixexü i pewa ngëxmaxü. Rü tama name i pëmaxna naí i ngëmaã pëmaxë, rü tama name i petëna naí ya yatümaã pëmaxë. Rü tama name i penaxü i pëxeneärü ngúchaü rü bai i nagu perüxínüëmare. Rü tama name i pexü nangúchaü i tacü rü to i chixexügü. Rü tama name i pegünaxícatama penanuxuchigüchaü i guxüma i ngëmaxügü, erü yíxema ngëma nacüma tüxü ngëxmaxë rü düxwa namaã tatupanaãx. ⁶Rü guxüma i ngëma chixexügüçax tá nixí i Tupana napoxcuëxü i ngëma duüxügü i ngëmaäcü maxëxü rü tama naga ñnüëchaüxü. ⁷Rü pëma ga üpa rü penaxü ga yëma chixexügü, rü yëmaäcü pëmaxë. ⁸Natürü i ñuxma rü name nixí i nüxü perüxoe i guxüma i ngëma na

pegüchi pëxaieü, rü pegümaã penüëxü, rü chixri pëmaxëxü, rü pegümaã peguxchigagüxü, rü guxüma i ngëma chixexü i dexa i nüxü pixuxü. ⁹Rü tama name i pegümaã pidorae, erü marü ípenatax ga nuxcúmaüxü ga pecüma rü guxüma ga yëma chixexügü ga üpa pëxügüxü. ¹⁰Rü ñuxma rü marü penayaxu i ngexwacaxüxü i perü maxü rü ngexwacaxüxü i duüxügü pixígü. Rü guxü i ngunëxügu rü Tupana pëxü ningëxwacaxüxëëchigü na yëxeraäcü pimëxüçax naxrüü rü yëxeraäcü nüxü na pecuaxgüxüçax ya Tanatü ya Tupana ya maxü tüxna äcü. ¹¹Rü ñuxma rü Tupanaçax rü nüëtama nixí ega Yudíu quixígu rü exna tama. Rü nüëtama nixí ega ícuwiechax-müpëxechiraügu rü exna tama. Rü nüëtama nixí ega tacü rü nachíüñecüãx i duüxü quixígu, rü exna tacü rü duüxü quixígu. Rü nüëtama nixí ega wüxi i coriarü duüxü quixígu, rü exna taxúxearüma duüxü quixígu. Erü ñuxma rü ngëma guxüärü yëxera aixcüma tüxü mexü nixí na Cristu rü guxüärü ãëxgacü yüxü rü guxawama nangëxmaxü. ¹²Rü ñuxma ya Tupana rü pëxü nangechaü i pëma rü pëxü nidëxëchi na noxrü pixígüxüçax. Rü ngëmacax name nixí i guxüguma pëxü nangechaütümüügü i togü, rü namaã pemëcümagü, rü tauxchaäcüma nüxna penaxã, rü taguma napëxëwa pegü íperütägü. Rü ngëxguma woo tacü pëmaã naxüxgux rü name nixí i yaxna namaã pëxínüë. ¹³Rü name nixí i wüxichigü i pëma na pegümaã yaxna pëxínüëxü. Rü ngëxguma chi texé tacü pëmaã üxgux, rü name nixí i pegüxü nüxü pengëchaügü i ngëma. Rü

yexgumarüü ga tórü Cori na pexü nüxü ngechaüxüüü, rü name nixi i togüaxü nüxü pengechaügü. ¹⁴Rü guxüärü yexera mexü nixi na pegü pengechaügü. Erü ngëxguma aixcuma pegü pengechaügü rü aixcuma wüxigu tá perüxünüë, rü meã pegümaã tá pemaxë. ¹⁵Rü name nixi na pemaã inacüxü i ngëma taã i Cristu pexna äxü na ngëmaäcü aixcuma pegü pengechaügüçax. Yerü yemacax nixi ga Tupana pexü idexechixü na wüxitama i duüxügü pixigüçax rü meã wüxigu perüxünüëçax. Rü name nixi i moxë nüxna pexägu ya Tupana. ¹⁶Rü name nixi i guxüguma peãewa nangëxma i Cristuarü ore rü taãëacüma naga pexünüë. Rü name nixi i meã peãëxü pecuãacüma namaã pegü pengüexë rü pegü pixucüxëgü na ngëmaäcü pegüaxü penangüchaüxëçax. Rü name nixi i aixcuma Tupanana moxë pexägiacüma nagu pewiyaegü i nagüxüraüxü i norü wiyaegü. ¹⁷Rü guxüma i ngëma pexüxü rü nüxü pixüxü rü name nixi i tórü Cori ya Ngechuchuégagu penaxü. Rü name nixi i ngëmaäcü Ngechuchuégagu Tanatü ya Tupanana moxë pexägu.

Tupana nanaxwaxe na meã namaxëxü i duüxügü i Cristuaxü yaxögüxü

¹⁸Pa Ngexügü i Ätegüxü, rü name nixi i petega pexünüë. Erü woetama ngëma nixi i mexü na penaxüxü erü tórü Cori ya Cristuarü duüxügü pixigü. ¹⁹Pa Yatügü i Ämaxgüxü, rü name nixi i ngüxü pengechaügü i pemaxgü. Rü tama name i ngümaã penuë. ²⁰Pa Buxügü, rü name nixi i guxüwama

penatü rü peega pexünüë, erü ngëma nixi i namaã nataãëxü ya tórü Cori. ²¹Pa Yatügü, rü tama name i penanuëxë i pexacügü. Erü ngëxguma ngëmaäcü penaxügüx rü ngüüächü tá nüxü nawaxtüümü i ngëma namaã nüxü pixüxü. ²²Pa Duüxügü i Ixäärü Coriäxgüxü, rü name nixi i guxüwama naga pexünüë i perü corigü i ñoma i naãnewa pemaã icuaxgüxü. Rü tama name i pexü nadaugüguxicatama meã pepuracü na ngëmaäcü penataãëxëçax. Natürü name nixi i mexü i perü ngüchaümaã guxüguma meã pepuracü erü tórü Corixü pemuüë. ²³Rü guxüma i ngëma perü puracü i pexüxüwa rü name nixi i perü ngüchaümaã penaxü ñoma tórü Cori ya Cristuaxü pepuracüxü rü tama i duüxügüaxü. ²⁴Rü marü nüxü pecuax rü daxügüxü i naãnewa rü tórü Cori ya Cristu tá pexna nanaxä i perü ämare i maxü i taguma güxü. Erü yima Cristu ya aixcuma perü Cori ixicüaxü nixi i pepuracüxü. ²⁵Natürü yixema chixexü üxe rü tá ta tanayaxu i tümaärü natanü naxçax i ngëma chixexü i taxüxü, rü aixcuma Tupana tá tüxü napoxcu. Erü Tupanapexewa rü guxüma i duüxügü rü nawüxigu, rü taxucüüwama texë Tupanachaxwa tiña ega chixexü taxügüx.

4 ¹Rü pemax, Pa Corigüx, rü name nixi i perü duüxügümaã pemecümagü, rü tama penawomüxë. iRü nüxna pecuaxächie na pema rü ta pexü nangëxmaxü ya perü Cori ya daxügücü! ²iRü guxüguma peyumüxëgü, rü pexuãëgü na tama ngextamare naxünüçax i peã i

ngëxguma peyumüxëgügu! iRü Tupanana moxë pexägü! ³iRü toxçax rü ta peyumüxëgü na Tupana toxü natauxchaxëëxüçax na nüxü tixuxüçax i norü ore i mexü, rü meäma duüxügümaä nüxü tixuxüçax i ngëma ore ga noxri tama nüxü nacuaxgüxü i Cristuchiga! Rü ngëma oreçax nixi i ñuxma ichapoxcuxü. ⁴Rü chanaxwaxe i chauxçax peyumüxëgü na meä duüxügüxü nüxü chacuaxëëxüçax i ngëma ore, erü ngëma nixi i mexü na chanaxüxü. ⁵Rü chanaxwaxe i meä pemaxë napexewa i ngëma duüxügü i tama yaxögüxü. iRü ñuxma na pexü natauxchaxü, rü yoxni paxa penaxüx i Tupanaärü puracü! iRü tama iperüchomare! ⁶Rü name nixi i guxüguma meä namaä pidexagü i ngëma togü i duüxügü, rü mexü i orexü namaä pixugü. Rü ngëmaäcü tá nüxü pecuax na ñuxäcü meä penangäxüxü i wüxichigü i ngëma duüxügü i perü öchigacax pexna çaxü.

Pauru nanaguxëë ga norü popera rü wenaxärü yema duüxügüxü narümoxë

⁷Rü nüma ya taeneë ya Tíquicu ya nüxü ingechaügüci rü tá pemaä nüxü nixu i chauchiga. Rü nüma nixi i mexëchicü ya chorü ngüxëëruü yüxü, rü nüma nixi i wüxigu chomaä naxüäxü i tóru Coriarü puracü. ⁸Rü ñuxma rü petanüwa chanamu na pexü nataäxëëxüçax rü pemaä nüxü yaxuxüçax na ñuxäcü toxü nangupetüxü i tomax. ⁹Rü Tíquicumaä petanüwa chanamu i Onéchimu i taeneë ya nüxü ingechaügüci ya aixcüma meä Tupanaärü puracü ücü. Rü nüma nixi i

petanüxü yüxü. Rü nümagü i ngëma taxre rü tá pemaä nüxü nixu i guxüma i çacü na ngupetüxü i núma. ¹⁰Rü pexü narümoxë i Aritäcu i wüxigu nuxma chomaä poxcuxü. Rü ngëxgumarüü ta pexü narümoxë i Marcu i Bernabéeneë ixüxü. Rü marü pemaä nüxü chixu i Marcuchiga na meä penayauxgüxüçax i ngëxguma petanüwa nanguxgu. ¹¹Rü ngëxgumarüü ta pexü narümoxë ya taeneë ya Ngechuchu ya Yuchugu äégacü. Rü ngëma tomaëxpüx i yatügü rü ngëxçatama nixi i Yudfügü i yaxögüxü i wüxigu chomaä puracüexü i Tupanaärü puracüwa. Rü nümagü rü poraäcü choxü nataäxëëgü. ¹²Rü ngëxgumarüü ta pexü narümoxë i Epáparu. Rü nüma rü petanüxü nixi, rü aixcüma nanaxü i Cristuarü puracü. Rü nüma rü norü yumüxëwa rü guxüguma Tupanaxü nacaaxü pexçax na aixcüma meä pemaxëxüçax rü peyaxögüamaxüçax rü aixcüma penaxüxüçax i ngëma Tupana naxwaxexü. ¹³Rü choma rü marü nüxü chadau rü pemaä nüxü chixu i ñuxäcü Epáparu poraäcü pexçax napuracüxü rü naxçax napuracüxü i ngëma taeneëgü i Daodichéaarü ñänewa rü Iráporiarü ñänewa ngëxmagüxü. ¹⁴Rü Luca, i duturu i nüxü ingechaügüxü, rü pexü narümoxë. Rü ngëxgumarüü ta pexü narümoxë i Dema. ¹⁵Rü chanaxwaxe i nüxü perümoxëgü i taeneëgü i Daodichéawa ngëxmagüxü. Rü ngëxgumarüü ta chanaxwaxe i nüxü perümoxëgü i Nifa rü guxüma i taeneëgü i yaxögüxü i napatawa ngutaquexegüxü. ¹⁶Rü ngëxguma marü nüxü pedamatüguwena i ñaä popera,

rü chanaxwaxe i Daodichéawa penamu
na ngémacũx i taeneëgü rü ta nüxũ
nadaumatügüxcax. Rü ngëxgumarũ ta
i ngëma popera i Daodichéawa
chamuxũ, rü ngëxguma pexũtawa
nanguxgu rü chanaxwaxe i nüxũ
pedaumatügü. ¹⁷Rü chanaxwaxe i
Ariquípumaã nüxũ pixu, rü ñapegügü
nüxũ:

“iRü meã napuracü rü yanguxëë i
ngëma puracü i tórü Cori cuxna äxũ!”
ñapegügü nüxũ. ¹⁸Choma i Pauru rü
choxmëxmaãtama pexcax chanaxumatü
i ñaã chorü moxë. iRü nüxna
pecuaxãchie na chapoxcuxũ! Rü
chanaxwaxe i Tupana pexũ narüngüxëë.

*Rü nuãma pexna,
Pauru*